

[www.BibleForChildren.org](http://www.BibleForChildren.org)


# Genesis 3




Ezi gumazim kamaghin nighnisi, an  
amuim, gumazamiziba bar men  
ovavir amizimin otogham. Kamaghin,  
a ziam, "lv," a gati.




Ikiavira Itir Godin Gavgavim asiziba  
bar adar ingari, ezi kuruzimra, an akar  
asuiba ko akar ifavaribagh amuava,  
arazir kamın asizir igharaziba bar dagh  
afira. Egha kuruzim kamaghın  
amizimın azara, “God ti azenir kamın  
itir iter oviziba bar dar aman guan  
anogoroke?”




Ezi amizim  
kamaghin an akam  
ikaragha ghaze, "Ga  
azenir kamın itir ter  
ovızibar amam. Ezi iter bar vamıran  
azenimın torimın tughav itimra, Ikiavira Itir  
Godın Gavgavim, an ovızitam aman bar  
gan anogoroke."




“A kamaghin ga migia ghaze, ‘Gua bar  
iter kamin ovizitam aman marki, egh  
uaghan an suighan marki. Gua kamagh  
damigh ovegham.’ ”




Ezi kuruzim  
kamaghin amizim  
migei, "Puvati. Gua  
oveghan kogham. Gua  
iter kamin ovizim amegh, guan damaziba  
kuighirightima gua arazir aghuiba ko arazir  
kurabagh foghfogh, egh Godin miraram  
otogham. God bizir kam  
gifogha iter kamin ovizim  
aman guan anogoro ke."



Ezi amizim iter kamin ovizimin gari, an ganganim bar deragha damamin dagher aghuiba an iti. Ezi amizim kamaghin nighnisi, “Kamaghin deragham, ki iter kamin ovizim amegh egh fofozir aghuir kaba iniam.”



Kamaghin, amizim iter kamin ovizir  
mam inigha aneme. Dughiar kam an  
pam a ko iti, ezi amizim temer ovizir  
maba isa uan pam ganingizi, an pam  
uaghan da ame.



Ezi aningin damazimning  
kuaghirezima aning uaningin gari,  
aning bibiamra iti. Kamaghin aning  
fighin iter afariba isa inibar min da  
isamigha, uan mikarzimning avara.





Ezi Ikiavira Itir Godin Gavgavim  
gumazimın dia ghaze, “Ni managh iti?” Ezi  
gumazim an akam ikaragha kamaghın migei, “Ki  
bibiamra iti. Ki ni barazi, ni azenir kamın arua izi,  
kamaghın ki atiatigha modo.”






Ezi God an azara, “Ni manmaghira  
fo, ni bibiamra iti? Tina ni mikeme? Ni,  
iter ovizir ki gua daman anogoroghezir  
kam, ni ti an ovizitam anemeghama?”




Ezi gumazim a ikaragha kamaghin migei, “Amizir nan roroamin min ikiamin ni na ganingizim, anarira iter kamin ovizir mam na ganingizi, ki aneme.” Ezi Ikiavira Itir Godin Gavgavim kamagh amizimin azara, “Ni manmaghsuavira bizir kam gami?” Ezi amizim an akam ikaragha ghaze, “Kuruzim na gifarazi, ki iter kamin ovizir kam ame.”






Kamaghın İkiavıra İtir Godın Gavgavim,  
gumazim İdenin Azenimin a batoke.  
Egha God nguazir an ingarizimra  
anemadazıma, an azenimin  
ingarasa zui.






Egha God gumazim ko amizim  
batuegha, enselin bar gavgaviba  
amisefe, eghti me Idenin  
Azenimin aruem anadi naghin  
tuivigh an ganam. Egha  
uaghan midorozir  
sabam ati.






Sabar kam, angazangarim ikia  
avir mizariar gavgavimin min  
pamtem isia, danganibar bar  
uabi gighavkira gari.







Dughiabar zurara enselin kaba ko  
midorozir sabar kam azenir kamin  
gara iti, eghti gumazitam temer  
ikirimirir angamira itim anidir  
kamin boroghin mangan  
kogham.




Ezi Adam uan amuim Iv ko akuizima, amizim navim asangi. Egha amizim otarir mam bategha ghaze, “Ikiavira Itir God nan akurazima, ki otarir kam ini.” Kamaghin an otarir kam ziam, “Kein,” a gati. Egha gin a Kein in dozim Abel bate. Ezi aning ekeveggha Abel sipsipbar garir gumazim, ezi Kein azenibar ingarir gumazim.




Egha gin Kein uan azenimin dagheba asigha, maba inigha Ikiavira Itir Godin ofa damuasa zui. Ezi Abel sipsipin nguzir mikarzim sara itir aghuir mam ini. Sipsipin nguzir kam, kar amebam faraghavirama otezir sipsipin nguzim.



Ezi Abel a misuegha Ikiavira Itir Godin ofa gami. Ezi Ikiavira Itir God Abel ko an ofa bagha bar ifonge, egha Kein ko an ofa gifongezir puvati. Ezi Kein puv atarava an guam ikuvigha igharagha gari.



Egha gin Kein uan dozim Abel mikemezima, an a ko aning tuzim itir danganimin zui. Egha aning ghua tuzim itir danganimin ikiava, Kein uan dozim misoghezima, an areme.



Ezi gin Ikiavira Itir God kamaghin Keinin azara, “Nin dozim Abel mana?” Ezi Kein ghaze, “Ki fozir puvati. Ki uan dozim geghuva an garir gumazim puvati.” Ezi Kein Ikiavira Itir God ategha, ghua nguazir otevir me kamagh diborim, “Aruavira Iti,” an an iti. Nguazir kam Idenin Azenimin aruem anadi naghin iti.



Egha Adam uan amuim uam a koma akuizi, an otarim bate. Ezi amizim ghaze, “Kein Abel misoghezi an areme. Kamaghin God Abelin danganim iniasa borir igharazim na ganingi.” Kamaghin a borir kam ziam, “Set,” a gati.




Set otogha givazima, Adam uam 800plan azenibar ikia, dar aven otariba ko guivir igharaziba ini. Ezi 930plan azeniba givazima, Adam areme.




Ezi Ikiavira Itir God, nguazim bar an itir gumamazibar gari, men arazir kuraba bar ikufi. Gumamaziziba dughiaba bar, uan navir averiamin aven arazir kuraba baghavira nighnigha dagh ifongeghavira iti.




Egha Ikiavira Itir God ghaze, “Ki ingarizir bizir kaba bagha osemegha nan navim biki. Kamaghin, ki guizbangira gumazamizir ki ingarizibagh asighasighti, men tav ua nguazimin ikian kogham.”



“Eghti ki asizir nguibamin itiba ko ruarimin itiba, ko kuaraziba bar, ki uaghan dagh asighasigham.”



Ezi Noa uabira, Ikiavira Itir Godin damazimin  
deravirama oto, ezi a bar a gifonge. Eghaghanir  
kam, a Noan eghaghanim. An otarir 3pla  
iti, men ziabar kara: Siem, Ham ko  
Jafet.




Noa Godin damazimin bar gumazir aghuim,  
egha gumazamizibar damazibar dera. Egha  
a dughiaba bar Godin boroghin ikiava a  
ko roroam gami.



God Otarir  
bar vamira iti. Egha  
God nguazimin itir gumazamiziba,  
bar me gifonge. A kamaghsua,  
gumazamiziba bar nighnizir gavgavim  
an Otarimin ikiva ovengan kogh,  
zurara itir ikirimirir aghuarim iniam.  
Bizir kam bagha an Otarir bar  
vamiran kam me  
ganingi.



2



60



Rom 3:23 Gumamaziba bar moghira arazir kuram gamigha, Godin angazangarimin saghon ikia an aven mangan ibura.

Rom 6:23 Guizbangira, arazir kuram ivezim isa uan ingangarir gumamazibagh aningi. Ivezir kam an ovevemra. Ezi God bizir aghuarir pura e ganingizimra kara, zurara itir ikirimirir aghuarim. Ikirimirir kam, e uan Ekiam Kraiss Iesus ko poroghava a isi.

Hibru 9:27 Gumaziba bar dughiar vamiran ovegh egh gin Godin kotiamin otivam.

Efesus 2:8,9 Ia nighnizir gavgavim Godin itima, a uan apangkuvimin tuavimra ian akurvasi. Kar ia uari amizir puvatizir bizim. Puvati.



God pura ia ganingi. Kar ian ingarimin ivezim puvati.  
Kamaghin bizir kam bagh gumazitam uabi uan  
ziam fan marki.

Rom 10:9,10 Ni uan akamin kamaghin mikim suam, “Iesus  
a nan Ekiam,” egh uan navir averiamin aven nighnizir  
gavgavim iki, kamaghin fogh, God Iesus gamizi a mozimin  
ua dikafi, eghti God nin akurvaghti, ni ikivira ikiam. E fo, ni  
navir averiamin nighnizir gavgavim Iesusin ikiti, God suam,  
ni nan damazimin dera. Egh uaghan ni uan akatorimin  
suam, “Iesus nan Ekiam,” eghti God nin akuraghti,  
ni ikivira ikiam.

Jon 3:16,17 “God Otarir bar vamira iti. Egha God nguazimin  
itir gumazamiziba, bar me gifonge. A kamaghsua,  
gumazamiziba bar nighnizir gavgavim an Otarimin ikiva  
ovengan kogh, zurara itir ikirimirir aghuarim iniam. Bizir  
kam bagha an Otarir bar vamiran kam me ganingi.”



“God uan Otarim nguazimin gumazamizibar jasin min me tuisighasa anemadazir puvati. A men akurvaghasa anemada.”

1 Jon 5:11-13 God ikrimirir aghuir zurara itim e ganingizi, e fo, migirigiar kam, a guizin migirigiam. Godin Otarimin poroghav itir tuavimin, e ikrimirir aghuir kam iti. Gumazamizir Godin Otarimin poroghav itiba, me ikrimirir aghuir zurara itim isi. Gumazamizir Godin Otarimin poroghav itir puvatiziba, me ikrimirir aghuir zurara itim isir puvati. Ia nighnizir gavgavim Godin Otarimin ziamin itiba, ia ikrimirir aghuir zurara itim iniasa, ki fuegha, kamaghin ki bizir kaba ia bagha da osiri.



# Jenesis 3 – 6

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Aruamu Bible (msy) © 2020 Pioneer Bible Translators This  
work is licensed under the Creative Commons Attribution  
Share-alike 4.0 license.

<https://www.bible.com/en-GB/bible/3007/MAT.1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

